

醫宗金鑑

卷七十至
卷七十四

御纂醫宗金鑑卷七十

編輯刺灸心法要訣

灸難產穴歌

橫逆難產灸奇穴婦人右脚小指尖炷如小麥灸三壯下火立產效通仙〔註〕婦人橫產子手先出諸符藥不效者灸此其穴在右脚小指爪甲外側尖上卽至陰穴也灸三壯艾炷如小麥下火立產

灸難產穴圖



至陰

鍼子戶穴歌

子戶能刺衣不下更治子死在腹中穴在關元右二寸下鍼一寸立時生〔註〕胞衣不出子死腹中宜刺子戶穴
鍼入一寸其穴在任脈經之關元穴傍右二寸

圖 穴 戶 子 鍼



灸遺精穴歌

精宮十四椎之下各開三寸是其鄉左右二穴灸七壯夜夢遺精效非常〔註〕遺精灸精宮穴其穴在脊之十四椎下左右傍開各三寸灸七壯

灸遺精穴圖



灸癆蟲穴歌

鬼眼一穴灸癆蟲墨點病人腰眼中擇用癸亥時灸勿令人知法最靈〔註〕勞瘵日久不愈互相傳染因內有勞蟲宜灸鬼眼穴穴在腰間兩旁正身直立有微陷處用墨點記合面而臥以小艾炷灸七壯或九壯十一壯多寡量人蟲卽吐瀉而出急取燒燬遠棄可免復傳擇癸亥日夜半六神皆聚亥時灸之勿使病人預知恐尸神有覺也

灸癆蟲穴圖



灸痞根穴歌

十二椎下痞根穴各開三寸零五分二穴左右灸七壯難消痞塊可除根〔註〕痞塊灸痞根穴其穴在脊之十二椎下旁開三寸半痞塊多在左則灸左在右則灸右如左右俱有左右俱灸之

灸痞根穴圖



灸肘尖穴歌

肘尖端處是奇穴男女瘰癧堪灸也左患灸右右患灸左並灸風池效更捷〔註〕肘尖奇穴灸瘰癧左患灸右右患灸左如初起時男先灸左女先灸右兼灸風池穴尤效風池穴在腦後顛顛穴後髮際陷中

灸肘尖穴圖



灸鬼哭穴歌

中惡振噤鬼魅病急灸鬼哭神可定兩手大指相並縛穴在四處之騎縫〔註〕鬼哭穴灸鬼魅狐惑恍惚振噤等證取穴將兩手大指相並縛定用艾炷於兩甲角反甲後肉四處騎縫著火灸之則患者哀告我自去爲效

灸鬼哭穴圖



灸中惡穴歌

尸疰客忤中惡病乳後三寸量準行男左女右艾火灸邪祟驅除神自寧〔註〕灸尸疰客忤中惡等證其穴在乳後三寸男左女右灸之

灸中惡穴圖



中惡灸此

灸疝氣穴歌

疝氣偏墜灸爲先量口兩角折三尖一尖向上對臍中兩尖下垂是穴邊〔註〕灸疝痛偏墜奇穴法用秤心一條量患人口兩角爲則折爲三段如△字樣以一角安臍中心兩角安臍下兩傍尖盡處是穴左患灸右右患灸左左右俱患左右俱灸艾炷如粟米大灸四壯

灸疝氣穴圖



灸翻胃穴歌

翻胃上下灸奇穴上在乳下一寸也下在內踝之下取三指稍斜向前者〔註〕灸翻胃奇穴上穴在兩乳下一寸下穴在內踝下用手三指稍斜向前排之卽是穴也


灸翻胃穴圖



灸腸風穴歌

腸風諸痔灸最良十四椎下奇穴鄉各開一寸宜多灸年深久痔效非常〔註〕灸腸風諸痔奇穴其穴在脊之十四椎下傍各開一寸年深者灸之最效

灸腸風穴圖



灸暴絕穴歌

鬼魘暴絕最傷人急灸鬼眼可回春穴在兩足大指內去甲韭葉鬼難存〔註〕凡一切鬼魘暴絕當灸奇穴在足兩大指內去爪甲如韭葉許名鬼眼穴灸之則鬼邪自去而病可愈也



鬼眼穴

灸暴絕穴圖

灸鬼眼穴歌

腫滿上下灸奇穴上卽鬼哭不用縛下取兩足第二指指尖向後寸半符〔註〕灸腫滿奇穴上穴卽兩手大指縫
鬼哭穴也下穴在兩足第二指指尖向後一寸五分卽是也

灸鬼眼穴圖



灸贅疣穴歌

贅疣諸瘡灸奇穴更灸紫白二癰風手之左右中指節屈節尖上宛宛中〔註〕灸癰風及贅疣諸瘡奇穴其穴在左右手中指節宛宛中俗名拳尖是也

灸贅疣穴圖



灸癰癰穴歌

癰癰隔蒜灸法宜先從後發核灸起灸至初發母核止多著艾火效無匹〔註〕癰癰隔蒜灸法用獨蒜片先從後發核上灸起至初發母核而止多灸自效

灸癰癰穴圖

癰癰



灸腋氣歌

腋氣除根剝腋毛再將定粉水調膏塗搽患處七日後視有黑孔用艾燒〔註〕凡腋氣先用快刀剝去腋毛淨乃用好定粉水調搽患處六七日後看腋下有一點黑者必有孔如鍼大或如簪尖即氣竅也用艾炷如米大者灸之三四壯愈永不再發

灸 腋 氣 圖



黑孔

灸瘋犬咬傷歌

瘋犬咬傷先須吮吮盡惡血不生風次於咬處灸百壯常食灸韭不須驚〔註〕瘋犬咬傷之處急急用大嘴砂酒壺一個內盛乾燒酒燙極熱去酒以酒壺嘴向咬處如拔火罐樣吸盡惡血爲度擊破自落上用艾炷灸之永不發灸韭炒韭菜也

灸蛇蠍蜈蚣蜘蛛咬傷歌

蛇蠍蜈蚣蜘蛛傷即時疼痛最難當急以傷處隔蒜灸五六十壯效非常〔註〕凡蛇蠍蜈蚣蜘蛛咬傷痛急勢危者急用艾火於傷處灸之拔散毒氣卽安或用獨蒜片隔蒜灸之二三壯換一片毒甚者灸五六十壯